



Pendekatan transformasi peraturan MIB pacu produktiviti

November 29, 2023 @ 4:19pm

Melaka: Melaka Industrial Booster (MIB) menjadi inisiatif terbaru Kerajaan Melaka bagi melonjakkan pelaburan, perindustrian dan hasil pendapatan pada peringkat daerah dan negeri.

Ketua Menteri, Datuk Seri Ab Rauf Yusoh, berkata MIB bakal menjadi pemangkin bagi membantu meningkatkan pelaburan ke Melaka, sekali gus usaha itu dilihat dapat memastikan pertumbuhan produktiviti mampan dan pengembangan ekonomi kukuh di negeri ini.

Beliau berkata, MIB menggunakan pakai pendekatan transformasi penyampaian peraturan bagi mempercepatkan kelulusan kebenaran merancang (KM), pelan kerja tanah, pelan jalan dan parit, pelan bangunan serta permit sementara.

Katanya, proses dilaksanakan secara serentak dan dapat diluluskan dalam tempoh 30 hari berbanding proses pemajuan berasingan yang mengambil masa sehingga 180 hari.

"Permohonan lesen operasi turut lebih cepat dan boleh dikeluarkan dalam tempoh 24 jam selepas mendapat Sijil Perakuan Siap dan Pematuhan (CCC).

"Majlis Perbandaran Hang Tuah Jaya (MPHTJ) menjadi pihak berkuasa tempatan (PBT) pertama di Melaka memulakan projek rintis MIB.

"Bagi tujuan itu, MPHTJ mengenal pasti pembinaan syarikat Dominant Opto Technology dengan anggaran pelaburan RM200 juta dan ia membuka 2,000 peluang pekerjaan.

"Projek rintis MIB oleh MPHTJ kini dalam tempoh pelaksanaan dan dijangka selesai pada 2024. MPHTJ sudah membangunkan Manual Pelaksanaan MIB bagi projek rintis dan diedarkan kepada pemegang taruh utama," katanya selepas melancarkan MIB pada 24 November lalu.

Inisiatif MIB adalah usaha sama dengan Invest Melaka Berhad (IMB) yang dimudah cara oleh Perbadanan Produktiviti Malaysia (MPC).

Pelaksanaan MIB diadaptasi daripada model E10: Permit Pembinaan Ekspres oleh Majlis Perbandaran Kulim, Kedah (MPKK) dan Kulai Fast Lane (KFL) oleh Majlis Perbandaran Kulai (MPKu).

Sahut saranan kerajaan

Sementara itu, Yang Dipertua MPHTJ, Datin Sapiah Haron berkata, pihaknya menyahut saranan kerajaan negeri dan Persekutuan bagi meningkatkan kemudahan serta kelancaran menjalankan perniagaan pada peringkat daerah dan negeri.

"Kami sudah mengenal pasti dan mengadakan sesi libat urus dengan syarikat yang bersama melaksanakan projek rintis ini.

"Usaha ini selari dengan amanat Ab Rauf pada majlis bersama ketua jabatan agensi Kerajaan Persekutuan dan negeri pada 19 September lalu yang menggariskan tujuh fokus utama negeri termasuk berkaitan proses pelan pemajuan di pusat sehenti (OSC) PBT.

"Ab Rauf juga menekankan PBT perlu berperanan menambah baik dan mempercepatkan proses kelulusan permohonan pelan pemajuan termasuk KM, pelan bangunan, pelan kejuruteraan dan CCC supaya tiada kelewatan berlaku," katanya.